



T 3210/8546. 81





錢塘縣志卷之二十二

人物 文苑

錢塘縣知縣南樂魏頌纂

哈佛大學漢和
圖書館珍藏印

東

古稱三不朽一曰立言文也者言之屬也錢唐地靈
人傑實產異才自三國六朝丁褚而下郁郁賔賔稱
極盛已嗚呼標榜盛而實學衰謏聞起而影響衆若
馬扶風鄭康成之徒今有其人乎鮑謝應劉風雅間
作王楊盧駱駢偶稱長凡具古人之偏者擴藝林之
譽者例皆得載焉志文苑

吳

丁謂

時尙門閥而謂地族寒微與陽羨張秉烏程吳粲雲陽殷禮並有時名顧劭拔而友之爲立聲譽以

並陸全之列仕吳至典軍中郎將

晉

褚陶

字季雅少而聰慧以墳典自娛年十三作鷗鳥水碓二賦見者奇之陶嘗謂所親曰聖賢備在黃卷

中舍此何求吳平召補尙書郎張華見之謂陸機曰君兄弟龍躍雲津顧彥先鳳鳴朝陽謂東南之寶已盡不意復見褚生仕至中尉卒宋時有褚含褚邊皆其後裔

齊

宋廣之

字處深喜清談初顧懽著三名論以正四本之失時賢並爲論難而廣之獨爲精詣

唐

章孝標

元和中進士下第作歸燕詩上考官庾承宣與知舉侍郎鄭愚唐百家詩載其集子碣登進士

亦能詩唐時錢塘以詩名者惟孝標父子

宋

錢昆

字裕之侗之子登進士第累遷至三司度支判官歷知七州治尙寬簡以秘書監致仕卒年七十六

昆善爲詩賦又善草隸有文集十卷

楊大雅

字子正十歲作雪賦稍長日誦書數萬言端拱二年乙科登第咸平三年交趾獻犀大雅獻犀

賦召試學士院明年上書獻所爲文二十餘萬言乃直集賢院歷二十五年不遷或笑其違世自守大雅難曰吾不學乎世學乎聖人吾之所有不敢以薦於人而嘗自獻於天子矣天僖中奉使淮南按部過金

陵江上遇風冠服盡失丁謂遣人遺衣一襲大雅不受宰相王欽若亦不悅雅晚與陳從易並知制誥出知亳州卒所著有大隱集職林兩漢博聞若干卷大雅幼孤自立刻苦為文躬儉約不妄進取人稱其為有德君子子洎濬
泳漸沆瀆六人

錢易

字希白年十七舉進士御試三題日中而就有司以其輕俊黜之然自此以才藻知名太宗語蘇易簡曰朕恨不與李白同時易簡曰今進士錢易為歌詩殆不下白上欲用唐故事召至禁林值盜起劍南遂寢咸平二年再舉進士甲科為光祿寺丞通判蘄州上疏乞除非法之刑帝嘉納其言景德二年舉賢良方正科除秘書丞擢翰林學士卒易才思敏贍數千言援筆立就真宗封泰山獻殊祥錄祀汾陰命修車駕所過圖經獻宋雅一篇易歌詩有義山長吉體而俊逸過之又善行草書有金閨瀛洲西垣制集一百六十卷青雲總錄一百卷洞微志十卷子二長彥遠次明逸

錢明逸

字子飛舉才識兼茂科父子三人皆中制科世以為榮累官翰林學士卒贈禮部尚書謚修懿

沈遼

字睿達邁弟也少好學傲睨一世讀左氏班固書少摹倣之輒近似乃鋤直縱舍自成一家長於詩

歌尤工翰墨王安石曾布皆學其筆法安石得其清勁布得其真楷趣操高爽不喜進取登第後遊京師偶為人書裙帶內侍買入禁中神宗初嗣位勵精求治見之不悅會遣使察訪兩浙就以諭之時遼為吳縣令遂遭劾王安石救之不能釋乃坐削籍後卜居池陽築室曰雲巢好事者多往遊焉遼追悔平生不自貴重悉謝棄少習杜門隱几間作為文章雄偉綺鍊曾鞏蘇軾黃庭堅皆與唱酬然竟不復起元豐末卒所著有雲巢編

韋驥

字子駿生而警敏年十七以文謁王安石安石甚稱許之曰吾行江南入吳越見文士唯子與董固

行耳由是名籍盛每一賦成學者傳誦既登進士累官利州路運判移福建路年饑議請賑貸驥以去京

遠不及上書待報乃檄州縣發廩而自請違洪之罪於朝聞盜險阻為州縣患吏畏怯爭言招納驥曰是為民稔患因處置斬捕方畧咸就捕部內肅然召為主客郎中出為夔州路司憲知明州提舉洞霄宮卒驥樂易靜退孝友廉平文章藻麗所著有韋先生集二十卷賦二十卷

周邠

字開祖嘉祐八年登進士第熙寧間蘇軾侔杭多與唱所謂周長官者是也

楊蟠

字公濟章安人貫杭州登慶曆六年第嘗作錢塘百咏詩歐陽修讀其集有詩云蘇梅久作黃泉客我亦今為白髮翁卧讀楊蟠一千首乞渠十月與春風王安石有答蟠書曰讀足下之文但知畏之願造讀所聞蘇軾守杭蟠為郡丞與軾倡酬平生為詩數千篇後知壽州提點荆廣鑄錢卒

周邦彥

字美成疎曠少檢不為州里推重而博涉百家言元豐初遊京師獻汴都賦萬餘言神宗異之命侍臣讀於邇英閣召赴政事堂自太學諸生一命為正字五歲不遷益肆力於詞章出教廬州知溧水

縣遷為國子主簿哲宗召對使誦前賦除秘書正字歷校書郎考功員外郎兼議禮局檢討官至徽猷閣待制出知順昌府彥工文章妙音律其樂府盛行於世自號清真居士有清真集二十四卷

吳天秩

字平甫幼聰悟勤苦該洽學者多從焉姿性恬退不嗜榮利杜門著書幾二十年後薦補太廟齋郎不赴授大庾尉辭再調浮梁尉到官逾年歿有文集五十卷

張雯

字子昭其先浚儀人南渡居錢塘力學嗜書所居臨市衢構樓藏書尤精於律呂每眾坐聞樂輒俯首頷蹙曰吾其不免乎於時宋亡故官老校猶有存者從之問宋遺事朝廷宗廟宮室車輿朝會宴享生殺咸得其詳所著書曰繼潛錄書畫補遺墨記子田亦工文詞田子肯少從金華宋濂學所為詩文精麗有法尤長於南詞新聲

汪元量

字大有為詩感慨有氣節嘗以善琴受知紹陵宋亡從三宮北去留燕甚久時故宮人王清惠

張瓊英皆善詩相見輒共涕泣或至文文山狼當所作拘幽十操文山倚歌和之元主聞其名召入鼓琴一再行乞為黃冠歸錢塘與故宮十人釀酒城隅哀音哽亂淚下如雨既歸往來在廬彭蠡間若飄風行雲莫能測其去留之跡自號水雲子有水雲集量自奉使出疆三宮去國所歷故都遺跡可喜可詫可驚可哭者皆收拾於詩劉辰翁馬廷鸞日詩史

元

錢惟善

字思復博學能文章長於毛氏詩至正辛卯舉於浙其所試羅利江賦為世所稱官至儒學副

提舉莆田陳衆仲雲間夏溥序其詩文稿行世

楊載

字仲弘其先自浦城徙家錢塘載少孤事母孝博涉羣書年四十以布衣召為國史院編修官延祐二年舉進士為浮梁別駕改寧國府推官載為詩文以氣為主黃文獻公評其文博而敏直而不肆尤以

詩名家人問作詩法答曰詩當取材於漢魏取音節於唐人多宗之與虞集楊奐斯范梈並駕齊名世稱

虞楊范楊云洪武初祀於杭鄉賢祠

楊葵

字彥常登進士第官至翰林學士以古文詩見重於臺閣工篆隸真楷張伯雨自負詞翰名然自以

為不及

仇遠

字仁近元初為溧陽州儒學教授工詩文一時遊其門者若張伯雨張翥莫維賢皆有名當時所著有山村集批註唐百家詩選洪武初祀杭鄉賢祠

張翥

字仲舉其先晉寧人父為吏官杭州鈔庫副使因家焉翥少負才豪放不羈好蹴鞠喜音樂不以家業屑意父憂之翥一旦翻然改業謝客讀書晝夜不暫假受經學於李存得道德性命之說多所研究復從仇仁近學詩盡得其聲律之奧遂以詩文鳴於時及門甚衆翥勤於誘掖絕去崖岸用是學者樂親炙

之有質經義者必歷舉衆說爲之折衷辨論至元末以薦起家累官翰林學士承旨封潞國公致仕卒年八十二翦長於詩其近體長短句尤工無子多散佚者僅有樂府律詩各三卷又嘗集兵興以來死節死事之人爲書

劉濩 字聲之其先莆田人占籍於杭劉汶字師魯宋鄉王錡六世孫二先生俱以德行文文章淑後進洪武

初皆祀學鄉賢祠

張昱 字光弼元季官浙省左右司員外郎卜居壽安坊剛簡亮達左丞楊完者提兵鎮江浙時光弼用材

畧參謀其軍府事一時聲望赫然既而退處西湖之上敝衣糲飯著書賦以自逸所居湫隘自署云晏居蓋自擬晏子云後宅敝友人凌彥冲爲募貲以輯之

白珽 字廷玉博綜經史詩文一主於理嘗著西湖賦二篇考據精核紫陽方面劉辰翁稱其詩過陶韋書

逼顏柳仕至浙江儒學副提舉所著有湛園集

明

高得賜 字孟升洪武間以文學薦授臨安縣學教諭陞高州府學教授永樂初召爲宗人府經歷纂修

大典爲副總裁進講春官博學洽聞詩文純雅名重一時所著有節菴集姚廣孝嘗稱其詩韶濩迭奏綺組雜陳江漢奔流曲折千里而不可遏洵一代之奇作云

白范 字以中號西塘才敏學贍詩格清奇仕至黃州府同知所著有虛室集

俞友仁 字文輔洪武初設科發解浙省第工詩書亦俊逸仕至校官卒

瞿佑 字宗吉學博才贍風致俊朗少不爲其父所知鄉人張彥復自福建檢校回家佑父殺雞具酒待之佑年十四適自學舍歸彥復指雞爲題佑應聲賦之彥復大加稱賞手寫桂花一枝并題其上以贈佑父

遂構傳桂堂一時名人凌彥冲丘彥能吳敬夫輩與為忘年友一日楊廉夫訪之出所作香奩八咏佑悉和之廉夫曰此瞿家千里駒也洪武中以薦授仁和訓導轉臨安教諭陞周府右長史師道振舉輔弼有法永樂間以詩禍編管保安久之釋歸復原職年入十七卒所著有春秋貫珠詩經正葩閱史管見鼓吹續音存齋詩集

盧浩 好古博學其為詩如不經心天然超詣流輩罕及

莫維賢 字景行洪武初為府學訓導好學能詩築別業於靈隱天竺間繞屋栽杏號曰杏園日與騷人

墨客游泮其中時人比之輞川所著有廣莫子稿

梁建中 早嗜伊洛之學復有志於文辭下筆滔滔數百言皆典雅溫厚絕不以聾牙佶偈為奇一時士

大夫皆稱譽之金華宋濂序其文集濂門人稱建中刻苦好學老而不倦以比漢之袁公業云

王羽 字儀之洪武庚午舉鄉試第一二十四年登進士為人方正敦重恬默自持為文根極理要不事交

蔓子宗賢鄉貢進士仕淮府長史

陳贊 字維成自餘姚徙錢塘洪武間以薦授府學訓導擢翰林待詔進博士命教內監冲和坦易人咸親

之官至太常少卿所著有自怡容臺諸稿

王洪 字希範洪武三十年進士以文學授翰林當開國時四方貢獻不絕如麒麟白澤元兔騶虞芝草醴

泉之屬凡頌歌詞賦率以命洪洪揮毫敏捷所撰制雖一時前輩咸遜謝不如與修永樂大典為副總裁

時秉筆者位在洪上洪持正不阿至欲載其家乘瑞應之徵又力言以為不可緣是見忌左遷禮部主事

會大宗伯奉勅巡行關陝凡部事悉命洪敷奏論事詳明朝廷方屬意重用而竟以末疾不起年僅四十

有二洪少有軼才與解縉王璉王備王達善齊名號五才子所著有毅齋詩文集八卷行於世

王榮 字希仁永樂中以乙榜進士授全椒學訓導陞淮府左長史至宣德朝歷官太僕寺卿致仕榮天才

敏捷為文不屬稿數千言立就有西漢氣骨立朝五十餘年聲實並著

俞和 字子中冲澹安恬隱居不仕能詩喜書翰工趙文敏書法好事者得其書雜趙帖中倉卒莫能辨

徐伯齡 字延之博學強記洞曉音律尤工樂府嘗雜集竈瓦數十枚考其音之中律者奏曲一章俄頃

而協所著有蟬精集二十卷

馬洪 字浩瀾以辭賦擅名東南清修苦節授徒以給養親之費皓首韋布而含珠吐玉聲價益重所交皆

一時名士每過從出游衣冠雜集車從都雅洪獨葛中草履高步其間人望之昂然若野鶴之在鷄羣詩

有大曆風致詞調尤極妍麗每一篇出人爭持稿去不甚惜故亦不甚傳

吳鼎 字維新少慧嗜學以文章雄一時正德丁丑進士授臨淮令臨淮為太祖發祥地有湯沐恩民多習

游惰鼎剽裁便決以辨治稱屬武宗南巡侍衛騎從數十百萬縣次續食有權貴人鼓焰先驅非分需索

鼎愛民持不與遂觸其怒因呼挺挺令鼎銳身先吏民當之吏民爭前衛鼎反擊傷權貴人事聞逮詔獄

嘉靖初始釋復原治歷南刑兵二部郎遷廣西叅議不赴鼎伉厲守高魁然負氣以直節著沉涵六籍旁

覽百氏為文法西京所著有泉亭文集子遵晦進士山東按察司副使侃侃直亮類其父時又有高讓王

正道常貞何敬皆錢塘人博學工詩文俱負文章重名

許應元 字子春嘉靖壬辰進士知泰安州以苞苴不入忤行部者且棄官因移知泰州稍遷都水郎復

忤分宜久之出知夔州府與學勸士輯和民獠每低徊三閭少陵遺跡彬彬儒雅稱儒吏焉已遷四川憲

副改廣西誅三巨獍辭已功掩前官之罪人稱其厚轉右使卒元自幼穎敏游心藝林為文宗西京與李

何起衰復古為武林倡夏文愍目為錢塘才子所著撰有漪堂水部等集弟應亨字子夏為詩具六朝初

唐風味海內稱二許子次紆能嗣其業孫
惠一舉進士應亨子仲譽萬曆辛卯舉人

田汝成 字叔禾性穎敏博學彊記流覽百家言覃心作
述為文沉涵濃郁有東漢齊梁風尤善為記事

書纒纒多雅致兩為督學使者盛有文譽在閩尤得
士心有田叔禾集西湖流覽志行世杭士自弘正來

揚聲藝苑者
汝成為最

田藝衡 字子菡汝成子以貢教授應天博學善屬文自
弱冠以詩賦著聲海內名公爭交驩焉所著前

後正續集數十卷雜著數十種多聞好奇世以比之
成都楊慎為人高曠磊落不可羈事至老愈豪朱衣

白髮挾兩女奴坐西湖花柳下客至即
其座酬倡斗酒百篇人又擬為謫仙云

楊祐 字汝承少英敏博學年十八領鄉薦八年始成進
士改翰林庶吉士明年出知興國屢遭讒忌時起

時躡歷官湖廣按察司僉事以暴疾卒於官年纔四
十餘耳當是時北地信陽以古文雄視西土而大江

以南則故翰林江瀾參議吳鼎共祐後先崛起初祐
之上計京師也鼎嘗作叙送之以為賈生明國體匡

衡富經術不是過也祐亦獨喜自負為文章奔放凌
轍若颺起泉湧其才氣沈雄岸偉旁不見曹伍然亦

以此見忌身不安位而年不竟才世共惜之所著有
端居興國西曹郵城濟南西江湖上荆南諸集藏家

洪澄 字靜夫少善文以孝廉官中書舍人詔誥雅贍
大學士商輅深重之以孫瞻祖貴贈如其官

方九叙 字禹蹟號十州少即嗜古工文長與海內諸名
家倡和甚有聲釋褐除兵部主事守山海關明

習邊務將率憚之葺倉貯穀散種食於民不徵其息
比代闔郡號哭擁馬首不得行偽留傳舍乘夜間去

積官知承天府性抗毅直行屢忤巨璫遂投劾歸益
討故業易綺麗入冲雅為人高朗善論事負經濟之

才不究其用
世共惜之

茅瓚 字邦獻少時夢神人授二巨字文曰見滄因以為
號讀書寶奎寺山巔始至夜雷雨大作崖崩數十

丈獨所居無恙質明露見滄二大字蓋故鏡宋理宗御書適與夢符中戊戌第一甲一名歷南北祭酒禮部侍郎兼學士加太子賓客賜服仙鶴飛魚以吏部左侍郎引歸

周詩字興叔嘉靖己酉舉鄉試第一丙辰成進士令南陵任丘皆有惠政歷官都給事太常寺少卿右通政詩詞藻綺天才俊逸銳精藝苑傲睨一世

吳之鯨字伯裔文才俊爽高自標置每一脫稿輒付削二俊太史馮夢禎學僉黃汝亨相友善所著詩文甚富萬曆己酉舉於鄉數上春官不第謁選得浮梁令甫六月卒所著有武林梵志十卷閩閣詩一卷

沈守正字無回萬曆癸卯舉於鄉謁選得黃巖教諭遷國子監博士擢都察院司務守正高才博學詩文俊爽喜為蘇白體黃汝亨胡嘉胤咸推許之郡守季某俾其子弟師事焉台卒諫海滋郡守丞縮守無

策叅政張師繹單騎入台守正伏謁道左師繹曰劇孟在此吳楚無憂正為設方畧殲大憝解株連口不言功中丞益重之

聞啟祥字子將博綜羣書尤工制舉業武林東南都會江廣閩越之士登賢書者公車到武林必質義於祥品題甲乙命梨棗日行卷制義之有行卷自祥始萬曆壬子舉於南雍嘗與吳郡李流芳同與計吏入京師已及國門忽意不自得趣車徑返後屢以薦被徵悉辭不赴性好延納每庀舟車飭厨傳宴會賓客若置驛然所著有自娛齋稿弟啟禎子淡明亦有聲

丁奇遇字孟嘉萬曆間古學寢衰業舉子者相戒蓄經史親牙籤錦軸陳書數十篋則詆訶為宦成物荒陋成習奇遇勵志復古與聞啟祥虞宗瑤宗政嚴調御武順敕創讀書社一月數會性孤異作文謝華振秀務為奇雋讀禮記疑其註未善覃精析義嘗至夜分心有感觸拍案狂呼曰始得聖賢意嘗乘舟入

茗溪與二三門人列坐榻管爲人代草啟事忽耳中
有聲謂人曰如此疾雷耶未及答顧視左耳則血從
裂縫中出衣若染茜漸昏迷
不省病數年卒有集十卷

吳杉

字松侶自鹽官徙錢塘杉少敏捷才氣奔放天啟
丁卯舉於鄉年止十八清姿玉立望傾流輩是歲
杉族兄太冲舉於應天冲宿負盛名屢躡始達而杉
以童年與之角勝風流文采照耀江表博習典故遂
至齊盟三上春官不得意而歸一夕卒兄冲哭之哀
曰松侶神清體弱遽爾徂謝斯人不壽乃文運之厄
非止家門不幸也家貧恥于謁事繼母至孝
雖被訶責無幾微忤意所著有松侶自怡集

湯之奇

字穉常少穎悟四歲就外傳讀書目數行下比
一年卽能振筆作文字語多奇峭不屑襲前人
字句先生長者矜異之萬曆戊午舉於鄉後官太平
府兼署江防事時流寇蹂躪梁豫間之奇設方畧擒
其渠魁餘悉解散督上下二糧餉所過立辦兵食以
濟尋陞江西瑞州知府未至官丁母憂居家閤門謝

客會浙撫疏薦以疾堅辭遂罷築室東園名曰蓬菴
讀書灌町課子姓其中所著有蓬菴類二十卷孫右

曾文譽冠當代戊辰成

進士今任吏部侍郎

鄭之惠

字孔肩一名圭父炳太倉倅嘗舉一子曰之翰
殤呼天而號夢登高丘有帝者凭玉几授以圭
拜而出見殿壁榜書勅十人抹之翰名易以之惠炳
不解後生男遂名之惠旣而又曰神授我圭遂更名
圭少補博士弟子員穿穴典故精研經史遂爲士林
所推十一入棘闈以貢士爲校官擢平樂令適平樂
有汰軍事軍譁不解之惠單車叩壁壘宣朝廷意事
遂定僅以常格轉州守未幾謝州守命告歸子鉉有
異才爲諸生甲申聞都城
變慟哭出門不知所終

張元徵

字夢珠元徵生時母夢龍含一珠授之遂字夢
珠生而穎異更折節讀書早歲喪母從父遠學
晝夜參悟豁然有得遂與鄭之惠齊名北面受業者
益衆武林屈指經明行修之儒無不以二家爲標的

久困諸生一試京兆為遂安方閣學逢年所知已而得乙及折副卷嘆曰嗟乎吾生平服膺元徵手其文不置而竟坐冬烘耶年且六十以明經令平遠平遠在萬山中民未知禮元徵時時從博士弟子說詩書講社學懸筆楚於堂示不忍用民益愛戴之

翁開之

字叔朗貌軒軒若霞舉天啟甲子舉於鄉閉戶讀書不與外事著述甚富惜失傳

丁允和

字叔介天啟丁卯舉浙江鄉試性和而介安貧自樂雖衣敝履穿恬如也以文章顯於時與翁開之齊名時有孝廉二君子之目

沈繼震

字子起少質直父置書膝上教督之繼震跪而受教及長周規折矩不踰尺寸為諸生四十年非試於有司不公謁亦未嘗一牘至郡縣門弟子束脩外不妄收一錢病妻弱女四壁蕭然支一足鐺以繼旦夕力學嗜書尤長於春秋窮老無子寢疾猶吟咏不輟晚更名曙張高士遂辰為作傳

施莊

字康夫居紫陽山少貧力學性穎異為諸生試輒高等願喜自負人目之曰狂生左方伯吳某極重之延上座莊衣大布衣着高齒屐踞客座高談今古燭跋不使去因謂人曰施生貧我周恤其家弗使知也烏傷傳巖奇其才以妹妻焉巖成進士而莊屢踏省門不見收設館鳳山之陽戶外屢恒滿武林號為施氏

學

何萃

字翰亦少孤力學與施莊友崇禎間兩中副車已卯以貢入南雍吳太冲時為司成移書吏部曰萃武庫甲兵今朝廷急士當及鋒用之會為忌者所阻免歸亦設館鳳山之麓武林從游者曰何氏學所著有古今治平畧補廿一史彙纂類法篇諸書

潘之淇之淙

之淇字爾瞻為諸生屢上有司輒報罷乃捐去俗學斐然有志於述作嘗曰能讀不能悟說鈴空濫觴能知不能行跛躄如瘡瘍於孝經小學易春秋尚書詩禮各有著為詩古文皆有法度

之宗字無聲與兄之淇自相師友家貧移書就寺燈
讀之終夕不寐以詩文名當世學者稱為二潘先生
宗子士韶
亦有文名

吳之龍 字雪門歙人生有異資讀書一日十行下治春
塘從學使葛寅亮講學湖南業日進時有英流之目
屢蹶不售遂絕意進取謁選得光祿丞與米友石劉
半舫諸名卿日唱和詩迅發老健性豪邁不樂繩束
還隱西湖結竹閣社四方詞人無不歸之瘦筇過頂
白髮飄然人謂地行仙云
子山濤崇禎己卯舉人

馮廷槐 少參自南兄子博洽羣籍下筆英邁自成一家
晚年自稱二酉山人不復求進取著武林近事

卷十

傅齡文 字長質禮部主事巖長子巖狗金華之難命齡
文前行得不死俄而有傳其父及兩弟俱死者

齡文欲反走視之人勸曰如以肉投餒虎耳何益齡
文泣曰天下有無父之人乎得侍先人九原文之志
也已而兵亦去歛父弟骨權葬於山中遂棄諸生奉
其母歸杭藜藿不克蓬頭垢面者且十年而卒齡文
少為諸生善詩古文喪亂後作詩多
以敗筆書壁間客舍人爭相傳誦

虞宗瑤 字仲皜吏部淳熙次子幼慧好學與兄宗玫閉
戶下帷自相師友玫字大赤豐軀偉貌初生時
面如紅玉故名為人樸訥罕事文餘而瑤則英敏爽
朗每發議輒解人頤與友交初甚落落久乃益篤一
友馮悛病將死謂其家曰吾貧不能殯將往死於虞
氏瑤聞之即共往迎悛與疾入其室三日卒遂買
地以葬瑤先玫二年卒卒之日玫束其
遺稿藏之明年火樓燬平生撰述俱盡

國朝

章士斐 字淇上諸生一桂子九歲喪母又一年而喪父
育於繼母高氏章氏故饒資一桂歿後為弟一

槐蕩廢都盡意寡嫂之旦晚去帷而此藐諸者必不
 克成就也是時士斐纔十有三歲耳奉祖母徐繼母
 高僦市樓一椽以居爨突不黔或三旬九食而性喜
 讀書家貧不嘗得油會承重祖母喪輒就棺下燈燭
 而讀之嚴寒無被覆以衰麻卷縮戰慄聲與歌誦聲
 間出隣人聞而憐哀餉以餅餌士斐進以奉母母不
 食佯曰已食矣還以飼孤士斐察母有饑色因大慟
 曰徒以不孝孤在累母至此欲往沈於河母高覺追
 及之母子相持而泣高曰兒能自振拔報我有日兒
 志何短淺也且哭且行牽衣而返士斐益復奮勵鑽
 研六經以及子史百家靡勿淹貫而深自韜晦不肯
 苟出與試或強之曰吾學未成也中表農部某以茗
 郡守故世通家命其子赴試於茗乞士斐與俱堅辭
 不行母高泣責之士斐跪謝曰兒聞士君子始進必
 以正今往試亦未必售即售得為榮耶年十九受知
 於錢塘令魏士章七覆核而拔冠軍郡守學使者皆
 試第一補博士弟子員旋食餼二十人中聲名鵲起
 錢塘顧咸建嘗會課諸生手兩卷不能定甲乙適臨

川陳際泰來杭顧出以示之陳曰某卷清廟明堂之
 音取科第如俯拾地芥某卷奇峭幽折殆昌黎所謂
 鑿空構立者吾斷知為古文作家然鴻飛冥冥非網
 羅中物也顧笑曰吾固取其必傳者遂拔士斐為首
 而以姚元煥次之姚後成進士而士斐竟以明經老
 焉為詩淡泊明淨得陶徵士風味年十歲時讀昌黎
 滕王閣記便悟作文無成法故嘗自闢蹊徑不屑襲
 前人一字一語始猶伯仲退之晚則駸駸乎司馬子
 長矣所著有花隱亭詩文集及天台固始兩縣志評
 述有國語國策莊子水經注讀漢書記文選八代詩
 乘韓昌黎集李長吉集纂輯有玉海名山記月令廣
 義職林故事荆川稗編訂補行世者有治平畧士斐
 卒年六十有一易簣之頃時母高尙在目不瞑淚涔
 涔下且注視久之忽疾呼阿母阿母而歿子三長戡
 功邑庠生能文早世別有傳次撫功歲貢
 生次藻功康熙癸未進士翰林院庶吉士

陳戩

字天祓早有文名下筆灑灑數千言不休登順治
 乙未科進士歷禮部正郎出守長沙未任以親老

乞終養凡七上臺憲不允竟以病告家居凡四十餘年足跡不入公府蕭然敝廬讀書自適巡撫趙公士麟每就其家咨訪戩於學道之外不及當世事天性孝弟父常患沉疾戩採藥天台山中遇異人授以方疾遂瘳世遺田畝盡舉予諸弟而不責以稅曰吾叨一命而不能庇弟昆其忍以催科累之乎妹適人早卒遺一女撫之無異已出士大夫以德行聞於鄉者首推戩焉丁酉典試陝西冰鑑稱得人有門生為天台令以戩家居食貧厚遺之方閩逆煽亂之後戩悉捐以贖難民其清介又如此年八十考終於家戩一生清介不事浮華深體躬行實踐之學雖一言一動不失先民矩矱者德如戩足以挽頹風而振末俗矣

陳祚明 字稍倩僉都御史潛夫之弟年十二就試學使者學使者閱其文驚異之曰汝倩人耶祚明日奈何倩人當面試面試拔置第一時有江夏黃童之目未弱冠隱居不出行文如長江大河一瀉千言筆不加點詩律工細在岑王沈宋間京師巨公聞其名爭禮聘之山陰胡兆龍宛平王崇簡引為布衣昆弟

交命子若姪俱北面受業焉凡條奏中外利弊時政得失祚明為屬草明剴切輒報可以故朝貴促迫暨焉筆墨者戶外屢常滿劉穆之目覽手答耳行聽受口並酬應世多不信有其人得祚明其左證已歲入脩脯可數千金而性豪爽一切客遊長安者知與不知生館死殯胥於祚明是賴家故貧營葬兄嫂及撫遺孤姪及孤姪子女各各婚娶食指凡五百餘勢不能息肩歸里卒客死京師所著有采菽堂詩集二十卷詞一卷又采菽堂古詩選評選戰國策行世未刻有采菽堂文集三十卷床頭集十六卷子曾藝能讀父書年十五作靈鷲賦頗似三都兩京格調著有斲冰詩集十二卷

吳農祥

字慶百宮詹太冲長子生三歲夢醒輒啼啼竟輒喃喃自語至五六歲方止乳媪諦聽之所言

似類永樂初靖難事者少時異敏一覽成誦家有賜書父友鄭觀察賡唐錢太守喜起朱明府稷錢明府朝彥咸折行輩與交好古之士自遠方至者婁東雲間金沙候官皆造請邀致堅謝不通既稟父遺訓亦

自以出與王許子弟為群在裘馬裘展間非其好也
 鍵戶讀書欲以著述成名茹經涵史馳騁百家然不
 妄作常語人曰為文當有關輕重非偶然者故雖伶
 人賈豎應其請乞皆有挽世末流咨嗟愛惜之意或
 有病其多者唯司空陳鼓永識之曰此盛世景卿麟
 鳳也經國宏業固賈生晁令之儔即雕蟲小技亦相
 如子雲之亞其為公卿所推重如此康熙戊午
 詔大臣諮訪博學宏詞之士數永遂以祥首薦而巡撫陳

秉直又以名聞咨送入京

召試太和殿俄為忌者所中報罷歸而網羅當代之遺聞
 蒐輯勝國之軼事著書自娛詩不下萬餘首多比事
 託詞之旨激昂發越蓋自漢魏以迄三唐詩人以來
 未有若祥文辭之富者總督尚書李之芳既定閩亂
 聞祥名請一見祥亦以李有大功於浙願往謁之至
 則長揖就坐翌日宴之射堂命軍中射以侑觴而屬
 祥即席草露布祥口占授吏執筆立書數紙詞義閎
 整已復從容陳善後數事李大驚曰今日乃見君幹
 濟才欲留之幕中祥辭讓歸曰某山林麋鹿非幕下

材且平生嘗笑徐渭今乃身自蹈之耶李知不能留
 乃聽之歸祥為人剛介亮直其為文條貫五經而尤
 精於易與蕭山毛奇齡友善嘗論五經同異及宋儒
 性理之學質疑送難反覆精析然不肯苟同所著書
 有補錄文獻通考八十卷綠憲讀史五十卷明史瑣
 事一百卷唐詩辯疑六十卷詞苑六十卷輿圖隸史
 彙考八十卷錢邑志林四十卷梧園雜志二
 十卷蕭臺集二百四十卷卒年七十有七

徐林鴻

字大文天才俊逸早有聲藝苑間時婁東雲間
 江左與武林諸名士各立壇坫以文章震耀一

時鴻以年少馳騁其間爭引以為重試有司輒冠一
 軍尤工詞翰上擬左氏下類兩晉人各藏弄以為榮
 一日在客座臨當遣使寸楮百函付鴻屬草信手給
 發頃刻而就會修浙省通志傳人物日可了十許傳
 咸謂有良史才戊午

詔舉博學宏詞之士巡撫陳秉直以名聞召試
 闕下試後病歸遂無意仕進奉其叔元彪掃一室臨流松
 竹讀書其中作為歌詩清新典麗多哀怨之音嘗游

滇上書當事勸立瞿式耜張同敞祠為作迎神送神曲絃歌之士人為擊銅鼓鳴鐵笛苗獍蠻女皆嘆息泣下漢陽王世顯南昌王猷定客死於杭鴻為視含歛送其旅櫬歸太倉王吳四明周容卒京師皆為治喪又收其遺稿歸付其家人所著有兩間草堂詩文集四十卷

張遂辰

字卿子其先江西人父徙錢塘因家焉少時穎異不屑為舉子業喜讀史漢百家言遂工古文一遊成均由吳江渡秦淮涉金焦過牛渚董文敏公其昌陳徵君繼儒見之曰天下奇才也因交李流芳錢謙益輩聲名藉盛幼善病日檢醫方因遂以醫名辰博綜典故考究古今無不精核年老益謙謹日讀書不倦詩格在右丞襄陽間年近八十始卒

徐元倬

字為章負雋才童時詣舅氏張青林所時高會賦之否倬援筆數千言舉座嗟賞張摘其中賓餞日月吐納烟霞二語榜其楹十六餼郡庠為人嚴氣正

性不妄與時流接與其弟元彪鍵戶讀書以尊遺經砥俗學為已任未嘗懷半刺謁人嘗嘆經義蕪穢後進小生類皆剽耳傭目茫無根柢故其為文必深入理窟而以清真出之力追正始會申西多難遂栖遯以老杜門伏枕足踪不屢闕外所著有壑存集三十卷湛華樓詩集三十卷卜臬篇十卷山圖別集四十卷

吳山濤

字岱觀晚號塞翁領崇禎己卯科鄉薦三任廣文授陝西鞏昌府成縣令彈丸小邑當兵燹殘破之後錢糧協濟極為民累抵任力請題改邑人至今猶建祠祀之二年即致仕終老吳山越水間嘯歌自得書法飄逸能自成家畫不入蹊徑殘山剩水揮毫自如然往往為世所重出關日賦西塞詩三十篇詞人學士多能誦之年八十七無疾終

陸培

字梯震父運昌吉水知縣與其弟鳴時鳴燧俱有名當世號龍門三陸而培兄圻弟培並以文章領

袖東南一時繼起復號三陸
 皇朝定鼎培以行人殉節圻與皆奉母隱河渚圻以醫往
 來茗水間而皆授生徒選試藝及鄉舉程墨為龍門
 集繼先志亦以資菽水歡也會圻構奇獄全家被逮
 皆夜行晝伏剋期至京匿所親所出牒求救已而得
 釋圻出棄家為緇流不知所終而皆仍教授於家巡
 撫張鵬翮高其行聘為師集浙省能文之士皆北面
 為弟子每試皆為定其甲乙成名甚眾刻有四書大
 成行於世

羅萬象

字森伯父源江萬曆歲貢授江南歙縣教諭世
 居江許學者稱為源江先生萬象早有聲壇坫
 為人篤厚純粹其教門弟子以孝弟為本文學次之
 一時江干名輩若何莘項大章何湘來並轡聯鑣爭
 衡藝苑已而四家子孫俱以科第顯而萬象卒老於
 諸生僅一子元儒誠慤有父風以父老服賈孝養而
 終無後云

沈九如

字宣子性至孝事繼母尤謹父鴻居好客遊燕
 趙閩粵音耗斷絕九如襍被往來不期歲奉之
 以歸為文有根柢晝夜矻矻垂老不休即其餘為制
 義屏掃膚廓癖澁之習垂老以明經為江山訓導時
 江山值閩亂髑髏滿山當事檄九如往收戰骨乃喟
 然曰是非仁人之意乎僕雖儒官何忍辭其難於是
 躬歷萬山自衢之九龍抵仙霞嶺穿虎狼荆棘中拾
 殘骸瘞之為大塚十有二處其餘隨地掩埋為文以
 祭之又奉檄視馬槽修壩梁濬灘河塞决口皆有功
 轉嘉興教諭督撫聞九如博學徵修浙江通志年幾
 八十矣館於貢院筆札犀利出腹笥而授之三旬而
 畢病篤呼其子宋曰吾有所語汝具紙筆記之問之
 已瞑矣

張芬

字子漸家宰瀚四世孫弱不好弄博綜典故有質
 疑者應之如數家珍時東南人才多負盛名芬與
 其叔岐然及江浩虞宗玖鄭鉉輩創為讀書之社其
 法約數人共讀一書數日務了一義盈科後進最有

條貫學古有志之士問難不輟而芬亦以砥礪行義
狎王齊盟為已任晚耽棲逸愛西溪衡山之勝時握
書一卷吟哦其中立石拒門編荆為戶危冠大帶不
入城市兵燹後盡亡其書老年默記從空甲乙指點
雖貧且病不廢也芬性孝友祖母病衣不解帶者三
年事伯兄如事父兄卒質錢以歛撫其子不啻已出
雍穆之風
尤人所難

吳名溢

字我匏崇禎二年補錢塘諸生時復社方行婁
東甬上諸名宿舟車絡繹溢皆與焉鼎革後棄
舉子業不復出兩喪皆廬墓著喪禮注晚年搆藥園
於城東與嚴沆查繼佐柴紹炳關鍵丁文策袁于令
邢豸佳吳山濤輩觴咏其中有藥園盍簪集查繼佐
序云明季文體詭變尚諸子百家仙釋語錄聲牙佶
屈之文溢乃沉酣六經蔚以實義作麟經詮解考三
傳互異折衷諸家為春秋詳注嚴司農沆嘗語人云
林巒標致當推是公非晚
近人物卒年七十有六

李式玉

字東琪少雋異讀書過目成誦年十七補郡庠
諸生十應鄉薦不利遂謝病去專力著述六籍
而外九流諸子旁逮外家雜說凡奇文古字罔不搜
討故其文詳贍閱肆能盡達其意所欲言尤善詩歌
精音律所著有魚川前集二集
巴餘集春城樂府三都樂府

吳秋

字雁市十歲能詩即自負不肖下人已乃見章士
斐遂驚禮曰是吾師也士斐於古文則尊昌黎於
詩則尚孟郊盧仝而秋則創為生割排突之調跳蕩
自喜遊京師諸貴人招之不往遊西江李侍講來泰
集名士與飲酒酣大聲曰吾浙中名士僅四人問其
故則曰吾師章洪上次則吾宗慶百志伊問其四不
答時多浙人在座深惡之康熙甲寅由閩入粵值兵
亂所善友為亂兵所縛徒步千里往救之轉客沅湘
間歸而發病且卒嘆曰吾死
無繼吾為古文詩者天也

吳岩茂

字念溪家貧力學砥行尤工於詩性好山水每
出游歸即成帙從游者日廣晚乃參究伊洛之

學盛暑嚴寒不輟注西銘太極諸書為士林所傳誦卒年八十有二所著有環山樓文集

郎星

字友月與虞汝翼友善兩人俱雄才博學嘗與人論古今廢興縱橫貫穿斐然可聽品格高峻務以氣壓時流得一奇快士必徧告同學借以齒頰不靳也星試有司冠軍者四十有九卒不遇所著有楞巖四書合疏

萬安縣志

毛先舒

後改名駉字穉黃生而早慧篤志嗜學六歲能辨四聲工詩善屬文為陳司李子龍所稱賞時文社方興舒與張綱孫沈謙陸圻柴紹炳孫治吳百朋陳廷會丁澎虞黃吳相倡和稱西陵十子山陰劉都憲宗周講學於戡山舒執贄問性命之學坐語移日及退宗周謂人曰毛生久以篤學擅名豈非東南之寶乎無何竟棄舉子業肆力於古辯析反覆必本經術有鄭玄王肅之概詩以大雅為主文自兩漢暨唐宋俱兼其體與修浙江通志所登必擇忠孝節義事人咸嘆服顧好談聲韻著韻學指歸謂字有聲有

音有韻而韻為尤要顧韻有六條一曰穿鼻二曰展輔三曰歛脣四曰抵齶五曰直喉六曰閉口又撰唐韻四聲表及詞韻南曲韻

諸書思古堂等集行世

虞汝翼

字異羽生而穎異為人談忠孝事撫掌驚四座意所不可輒面斥之翼家世以儒顯弱冠即擅作者名古文雄辯馳騁為詩古雅弘健以文名雄兩浙者幾四十年卒不見售憂憤成疾卒

沈謨顯

字靖宸少穎悟博涉經史百家年十九補諸生試輒冠軍為文理法純粹時徐太宰潮方就外傳贈公欽安以為微某莫可師者因延家受業焉顯業日進理益淵邃而文益高老四方來學者戶外之轍恒滿甲午闈卷俛得復失癸卯以貢入太學丁巳選石門訓導設六條以課士薰其德者悉成令器顯為人師最有法度授以經學具盡淵源門弟子登科第者上則以勳業顯其次亦文雄一時如徐太宰潮顧進士鐔其最著者也顯性孝友一門內順睦為人煦和冲穆尤篤於姻戚有以緩急告者傾囊以應不

責償甲寅紫琅山寇竊發難婦轉徙流離者百計營贖之不問有無已未
詔舉天下博學宏儒之士當局者欲薦之堅辭不赴越癸亥而卒所著有澹園詩文等集

陳晉明

字康侯侍御潛夫季弟潛夫既以節死晉明偕兄麗明祚明奉母隱河渚不出幼時偶以嬉戲

失母歡將撻之晉明隨自伏地受責曰母無傷手後博極群書尤敏於詩學造沈宋王岑之室而要歸於杜陵間或授徒效為制藝受其業者皆掇高第去所著有詩留拾纓采菽堂等集所選有八代詩鈔初盛唐詩嘗謂王李但揭高華鍾譚專搜冷雋兩者失均故其選唐也融二家之旨而集以大成稱善本云

王脩玉

字倩修父名世明歲貢為鄱陽令修玉性至孝弱不好弄而嗜讀書方成童祖母陳老且疾每

夜露薌祝天願減齡益祖母壽忽夢黃衣人示朱書九十三字後竟符其數父以誣獄被逮吏卒環之嚴脩玉往視鞭笞交下不為動父在縲紲凡飲食溲溺俱脩玉手報其勞後卒得釋弱冠以第一餼於郡庠

家貧饗殮不給不廢吟咏以故學益淵邃制府趙廷臣以厚幣聘教其子脩玉不忍違諸生去固辭中丞范承謨嘗語學使曰君知王某乎不獨其文可重人尤可師也歷試鄉闈十有七詭得復失者三戊午貢京兆時徐太宰潮以詞林分校得脩玉卷嘆曰此名儒宿學也拔第六部授邑博士當是時

天子方下詔舉博學宏儒科嚴司農沆王都諫某擬以名上脩玉堅辭歸家益貧日常一食暑月著故綿衣恬如也因號恬翁性方嚴不可惑以非義於人落落難合既定交久而不衰與毛先舒吳任臣虞黃吳徐旭齡輩訂詩文交世稱鷺山十六子楚術士朱方旦至武林官吏以下皆執弟子禮每出男女擁簇門人或欲往謁脩玉止之曰術家妄言禍福與之遊多不測憂况方且復侈談理學諛者謂過程朱更相銜耀敗亡日矣未幾朱果被劾棄市株連者甚夥眾始服其先見平生著作甚富而尤工於詩少與西陵十子相倡和中年好遊覽因探禹穴登岱峯入闕里拜孔子廟堂至天台訪石梁之勝凡遇於境而觸於心者悉

發之於詩以故神明變化純任自然晚而益進著有
汴遊松壑蕭遠堂據梧叢說等集各如千卷卒年七
十有四葬黃鶴山下學者私謚曰文節先生

徐繼恩

字世臣性至孝父病刲股以進而愈繼恩生而
早慧博極群書補博士弟子與陸圻培柴紹炳
吳百朋孫治友善以文名雄於時中崇禎壬午副車
鼎革後絕意仕進遊於方外所著文辭甚富有周易
畧解漆園指通師古堂集諸書行世

孫浣思

字嘉客少為諸生名籍甚屢試輒高等明季東
南盟社蠶起爭得浣思為壇坫主而浣思又愛
賓客四方來謁者屢常滿戶外勅中厨辦肴核劇談
賦詩累日夜不厭罹祝融者再家益貧晚年閉戶著
書為樂卒之夕口占絕句四首端坐而逝

沈佳

字昭嗣兒時即有志伊洛之學及長著名儒言行
錄大全粹語春秋學徵脩浙江通志及一統志晚

年著易大象說易解明代人物考樂府中聲蒼野集
省愆錄皆研窮性命之書所居名學士園自少壯以
至通籍及歸養未嘗輟書卷武林士大夫推佳為學
者登戊辰進士授監利縣令抵任八月以終養歸復
補安化縣卒於官親喪三年麻衣粗食哀毀骨立佳篤於根本故能盡孝道云

孫治

字宇台少穎異通左國春秋喜秦漢文故其為文
沉鬱入古與弟洽為諸生祭酒隱居教授講學湖
濱友人陸彥龍臨歿托以女治擇吳任臣妻之吳百
朋宰南和客死治往經紀其喪性廓落不羈然好獎
拔士類卒年六十有五

章戡功

字服伯母沈孕二十四月而生生而髮覆眉目
三日父士斐試其啼聲曰此再來人也幼凝重
不苟言笑九歲通五經提筆能文章屢躋童子試年
三十八始受知督學劉霽案發而戡功歿已四日矣
歿之夕隣人露坐見火光迸屋梁出升墜者三群方
喊章氏火既而聞舉家哭聲咸詫異之戡功善詩古

文纂輯新舊唐書六十二卷尤精點染師董巨惜少
存者妻羅氏苦節四十年以弟藻功子繼泳為後曲
盡色
養焉

顧龍文

字仲御生而溫恪不妄言動為文宗先正屢試
與弟豹文互冠軍世咸謂顧氏二難順治初文
章之士通南浙稱盟會水火異同所在馳騫龍文杜
門不與獨與陳國器朱建寅錢世瀚鄧維垣馮上驥
輩為性命交性尤孝友約已
和而介為同類所推重云

葉大緯

字緯如長身高步每盱衡時事援經據史聽者
開發篤於友義順治初謝諸生任駱村不入城
市甲午侍御姜圖南言於督學此天下才不可失檄
使復諸生已酉舉於鄉未幾病卒所著有嶽表堂集
朱大點 字幼鴻弱冠以才名聞於時與江起蟄友善為
諸生都講擁皋比升上座長筵廣席環而侍聽
者日凡百十人所著
有易解三十二卷

江起蟄

負氣抗直不少假是非而獨善處人骨肉間與
朱大點咸精於易時武林言易名家必稱朱江
從游者日廣所著
有講易數言十卷

鍾越

字異度少負軼才游太學於書無所不綜好購書
畫至礙行路著史評與古人相出入所交盡名士
而與許璣鄧名揚
俞龍友為尤善

許璣

字天儀為諸生以文明於時崇禎丙子中副車與
朱東觀陸彥龍章士斐相友善有唐書纂二十卷
鄧名揚 字左名性至孝年十五與其父同游於庠讀書
目數行下手自寫書至數尺周禮考工自有注

俞龍友

字雲君幼孤嗜學為諸生試輒高等與鄧名揚
少相結縱飲連日夜未嘗內食坐上一日無勝
友輒不怡為詩新穎出人意表子星留少孤能屬文
謁總河靳輔於河上遂留心水利滙蘇松常鎮杭嘉
湖為七郡水利
一書未竟而卒

蔣庸 字不易通諸經尤粹於易著易解一編行世

張競光 字又競推官懋忠子年五十學為詩有建安黃初風格將死以屬其友吳農祥集而傳之

吳農復 字敦仲太冲次子少年操筆即能為文作蚊檄及范增辨縱橫自喜太冲司成南京攜以往為

黃相國道周所賞六赴棘圍得而復失復性孝友嘗封股救母姊適高楨濟濟死復迎之以歸年三十六

而卒

施瑞麟 字儀吉為文精深弘博每試輒高等大學士黃文僖機聞其名館之東閣康熙丙午

詔求實學以策論取士瑞麟謂機曰士必明孔孟程朱之理而後可以議論經術柰何舍本而求末乎機遂疏

請復制舉義門下士多取科第去而瑞麟顧以明經老為兒時封股以療父疾其後子裕真幼見其創而

問曰此何為者麟語之故裕貞曰行孝當如是麟曰脩德礪行顯親揚名乃謂之孝今不得已傷其體膚

未足為孝也瑞麟著書甚富而屢燬於火其僅存者存古堂詩集十二卷

汪之涵 字偉生原籍新安今徙錢塘開朗通達遇事能斷國初當事以人材薦當除邑令謝不往乃

署餘杭訓導捐葺學宮請廣泮額嚴侍郎沈稱其端規礪俗有胡安定之風邑紳士為勒石明倫堂以頌

之未幾謝去歸家後著書自娛蕭然物外年八十餘卒

沈蘭戩 字方稷幼聰穎絕人年十一應童子試作大樹賦見賞於司李雲間陳子龍十七歲補博士弟

子嘗作太祖平元賦當世艷稱之年十九國朝鼎建即與兄蘭先及同志諸人講學河渚不與試

事室常屢空晏如也中年深究易理作易義炳闡明先聖之微義其後授經弟子執經受業者甚眾為學

以躬行實踐為本不屑屑為章句天性孝友事父母以色養稱敬愛兄弟處族黨姻戚間一以誠意孚人

晚年益從事心性之學子位中性篤孝言論不苟受業於應為謙之門其學一以誠敬為歸歲時祭祀必

齋戒易素服朔望展墓常徒步數十里講學棲水操行端方友愛諸昆弟尤為篤至弟用中歿位中自棲水歸拊尸一慟得喀血之証而卒

施清字伯仁少穎悟篤學嗜書為伯邦曜所知及長工課士嚴而有法除陝西布政司經歷尋知巴州會應

詔舉博學弘詞試闕下歸數年起廣州判以內艱歸補永州王岳麓書院講席學者雲集所著有十三經異同解攬雲懷新等書

陸堃字左城吉水令運昌第六子少有文名藻思綺合所至皆有逢迎幕府羅而致之軍書旁午數千言

立就所著有丹鳳樓諸集

洪昇字昉思少負文名車轍至止公卿大人咸虛席以待尤工樂府宮商五音不差唇吻旗亭畫壁間時聞雙鬟謳誦之以故兒童婦女莫不知有洪先生者顧性落拓補修所入不啻數千金隨手散去尋以老

病歸里而卒

裘之雄字偉南篤學砥行以文名顯於時甲申後絕意仕進士大夫非造門延訪不一往見與朱東觀

陳廷會及其甥陸圻堦相契好時稱其特立獨行比古之婁師德云所著有天中記時物令序纂歷代史

傳紀畧諸書以子陳珮貴贈如其官

錢照字水鑑幼即能文十七補諸生試輒冠軍時文社方興照與兄封狎王齊盟四方之士負笈徒步而來者咸願出門下以為榮受其指畫無不拾青紫以去而照卒以諸生終已酉闈中文為主司所賞得而復失遂罷

試尋卒

仲恒字道久父敬則以文行著於鄉載郡志恒九歲能文長負氣節事母金少不憚即長跪俟顏霽始起伯兄鼎遭謗下獄恒未弱冠變服為傭保策應得脫居常泊如與其婦鍾校讐卷帙或累月不出庭戶於

書無所不讀所著有四書彙纂二十卷大禮簡四十卷春秋井觀三卷宋詩鈔萃十二卷詞學全書四十卷淇園文集十卷編年詩鈔八卷題虹詞六卷學者稱雪亭先生婦鍾忠惠公化民女孫名筠字蕢若以賢孝聞所著有梨雲榭詩餘三卷琪園詩文集四卷子清有經術能世其家

錢彥雋

字聖楨淵靜嗜學幼即潛心經史嘗赴越省祖墓遂應試為山陰諸生弱冠遠遊秦豫與新鄉

呂中丞叔琳楚黃張侍講希良華山王徵君弘講論經學著有冠禮易從古皇帝考古史異諸書晚益肆力實學與毛奇齡沈佳王復禮輩集四方宿儒傲釋奠禮設經會於學士樓有曾子問大學講錄行世天性孝友幼喪母哀燬如成人色養耄父委曲先意及卒執喪旦夕不離苦塊會隣火夜發倉皇度不可救烈焰中猶衰經杖跪呼號欲殉按察使于準急率役昇柩得全年六十七卒

王丹林

字赤扃康熙乙丑拔貢授中書舍人丹林年十五喪其父祖所分貲產約三千金盡推與其仲

兄章而勵志讀書兄亦有成就其弟之意然不數年而兄盡廢其貲產丹林乃為貧士會以貢入京又為其兄代償稱貸者累數千金絕無怨言丹林善屬文試必高等而屢躋省闈其在京師刻意為詩麗而有則終中書舍人病歸卒年五十一子宸雋善書供奉

內廷

吳容

字端公早慧八歲通五經鉤索馬鄭毛杜諸家遇三代器物舉對如目前事父農祥嘗嘆曰吾家讀

書得古人法者其屬之此兒乎容少受業沈均陳廷會之門兩賢為東南碩儒及門甚廣而以容為首年十七博諸生為文屏去一切馳騁時態詩婉而多風尤善書喜李北海與修浙江通志及杭郡志卒之日年僅三十有一先是容嘗有詩云處世多孤憤因循病易成洛陽空賦鵬祇恐不長生或怪其非吉至是果兆斯讖云所著有秋吟集十卷

吳以鏞

字在梵幼孤與伯兄某竭力養母以孝友聞鼎革後隱居教授不求仕進家藏書數千卷手定

丹黃凡有裨於世道人心者鈔集成
書名迪德錄徵士吳農祥為之序

周世傑

字沛甄原籍常州隨父宦游遂卜居錢塘少穎
敏十四補諸生為文縱橫排蕩工詩與王脩玉

齊名修玉以學勝而傑以才勝嘗謂詩貴自出性情
袁不擬劉高不仿薛何必步趨先民循循規矩也歷
試不售貧甚詩益工年七十有七
卒無子所著有觀雛草堂等集

張灝

字禹臣為人木訥寡言笑而善讀書好談古忠義
事受業章士斐之門為詩初從宋人徧取宋人集

甲乙之將以問世不果後取漢魏六朝詩誦之詩益
工嘗就正於毛奇齡奇齡為訂定題其卷首曰三百
篇章撫功為之序所謂雪巖詩
集者也卒時八十有七無子

戴大受

字與可別號華琳早年即棄舉子業志古學博
聞強識自經史諸子天文地理無不覽究更取

五經傳註精研之為窮理盡性之學而尤邃於性理
一書鉤元探奧因喟然曰聖賢之道聖賢之心也聖

賢心即吾心也蓋與宋儒之默契道體相印合焉嘗
中夜賦詩有靜契羲圖明月近壯觀帝典惠風和之
句又俯仰悠然文字外風行海宇月行天其造詣如
此居恒語子若孫吾自少至老每十年輒成一書皆
手自編錄其已刻行世者曰世寶錄醒心錄蓄德錄
皆集古嘉言懿行條分而品節之多與人為善之意
其老年刺草及美拙百咏多發
抒其胸次所自得云年九十

諸匡鼎

字虎男少而博覽群書壯喜出遊間就鉅公幕
拏舟負笈率攜書籍以行暇即纂述故一生所

著有橘苑詩文鈔楚遊日記茗柯詞等篇
所稱說詩堂集者是也子璧發能世其業

沈鏞錫

字子方負軼羣之才聲振庠序為文洋洋灑灑
貫穿秦漢唐宋而尤精於左史二家言詩愛玉

溪生曰登老杜之堂而免於僉拙之弊者惟義山一
人耳以醫世其業望沈君來如望慈父母來則應手
輒愈自督撫下咸敬禮之嘗延坐竟日與談經濟
事掀髯長嘯丰采奕奕動人人亦莫測其底蘊也

陳成永

字元期性孝友少雋異工文章康熙丁巳領浙江鄉薦辛未成進士甲戌殿試授翰林院庶吉士以內艱歸尋卒不竟其用論者惜之所著有攸好德堂集

孔衍昌

字旦華至聖裔少魯力學攻苦丙夜不休乙酉補諸生旋以五經中式時衍昌年纔二十一耳儒雅翩翩哀然首選同學者咸望塵不及而衍昌絕不以此自滿性孝友篤於友誼平居多撰著善書畫年不竟才僅二十九而卒士論惜之

姚廷益

字贊師幼聰慧喜讀書博學強識外無所好十餘歲已善屬文十四補郡文學有名諸生間旋以拔貢入成均試輒冠多士為文章根本秦漢反刻以樸削偽以真時司農嚴沆侍御顧豹文東南壇坫之宗深器重之為序其遜志堂文集行世康熙癸亥年

詔修各省通志浙撫中丞王國安禮聘名流皆先達紳士唯廷益與今翰林章藻功以年少預其中謁選至京

師掄才授中書舍人得疾馳歸遂卒廷益事親孝父士章疽發於背危甚諸醫皆不能治廷益徧禱於神不應時有善乩者奉呂祖頗神驗廷益復泣禱請以身代俄而乩動云賜汝丹一粒及視之果丹一粒調以進父服之痛立止遂愈一時傳以為神然廷益年竟不永人皆惜之有烈山遺稿詩五卷四明山人李屺源為之序納言楊彙誌其墓云

張錢澧

字佩兵幼穎悟年二十一受知於督學姜櫛拔置第一生平耽吟咏家貧嘯歌不輟然困於諸生鬱鬱不得志而卒所著有平壽堂稿

汪于高

字睡菴孝子之夢子之夢病南屏之壑菴高時年十一求省其父迷所向遇親故欲挈之歸不可因與偕往父卒事長兄折節循謹不求仕進儒隱於家善讀史過目不忘晚尤粹精於易謂消息存亡之理可以會天地於一身作為歌詩閒遠凄切尤善擘窠書所制筆長八尺曾書觀自在菩薩五字於天

竺山門卒年六十有三妻吳氏性至孝事姑有道相夫子凡親戚流離失所者脫簪珥以周給之

茹之宏

字棕毅性孝友喜讀書工古文辭補諸生試輒高等名籍甚晚棄舉子業出遊湖湘間探二酉

之勝後歸隱邑之安溪坐臥一小樓雖鄉曲罕識其面年八十三卒子鑣鎬俱有文名

陳廷璋

字克涵幼慧才思敏捷性篤孝事父色養備至康熙辛卯以五經舉浙江鄉試第一再上春官

不第尋卒兄廷度有詩名亦早世

汪案

字我浚生平篤學嗜書手披經史暑寒不輟尤以至孝譽重鄉黨生養死葬莫不當禮持身正毅人

不敢干而接物復極和易後以明經司鐸樂清清為山邑士鮮文行案以器識文藝勤加訓課有安定風

且於士之貧乏者捐其俸資以助膏火既歸猶築蕉室讀其中聞者稱之

王元斌

字滄升修玉也多才力學聲噪覺序每試輒冠一軍已已

翠華南巡江浙元斌獻太平一統賦顧問稱獎名動公卿間歷試浙闈三以五經應舉經義湛

深原本注疏絕非時流襲取者比屢為主司所賞限額卒不與為人倜儻豪邁而制行不苟母得危疾與

弟元穉割股合煎湯進病立愈與人交然諾不欺粵東學使臧大受聘閱文中途輿人以兼金密餽求為

邑子入泮元斌怒此去而嘿不發其事及門如沈近思輩得其指授皆以名顯借徐太史杞遊桂林病卒

太史為歸其喪著有寶言堂集滄洲遊稿

論曰昔聖人刪定六經以授門弟子而游夏始以文

學著及聖人歿而微言絕七十子終而大義垂陵裔

於戰國燬滅於暴秦至漢文始求遺書伏生申公轅

固韓嬰毛萇之徒稍稍間出默識口授補綴殘闕而

賈誼董仲舒蔚爲儒宗其餘諸生多講論同異史記之傳儒林儒林卽文學也以其博學洽聞通達經術有功於聖道也自范曄後漢書儒林之外復有文苑於是始分之爲二夫東漢之末漸趨排偶協之以宮商飾之以華艷至六朝而極於靡麗斯文之弊也甚矣然則果可謂之文學歟賴昌黎挽之於前歐陽正之於後至周程張朱出而理學之風遂盛於宋於是文苑儒林又析之爲三其不可謂之文學歟夫去聖愈遠則其末愈分其弊旣滋則其返必速易曰同歸

而殊塗一致而百慮儒林文苑理學非有殊也而兼之爲難專而精之爲尤難故嘗求其人於科目試之以制義非理學歟試之以明經非儒林歟試之表判觀其弘博試之策論以覘其經濟非文苑歟乃科目之內百不得一二焉而所謂儒林文苑理學之士又不必皆科目中人其故何也吾錢塘無理學自宋迄於

本朝僅得三人焉曰張九成郎曄應撫謙儒林十八人曰范平全緩輩乃文苑則稍廣矣考之前史亦然然則

工文章者代不乏人也其所撰述果足升游夏之堂而不背於聖人之道吾不得而盡知之也大雅君子其爲我鑒別之

錢塘縣志卷之二十三

錢塘縣知縣南樂魏嶮纂

人物 孝友

孝庸行也實百行之先自服勞奉養以迄立身揚名今之世得古人一行亦足以風矣乃徃徃學士大夫反不如田野貧賤之子此何說歟錢塘之孝其類不一或捐身報父讐或救親蹈水火死或至性過人哀毀實身或終身不仕以奉其親要皆世之所難友者孝之推能孝斯能弟孔子曰宗族稱孝鄉黨稱弟蓋

爲仁之本而犯上作亂之所由鮮也雖稱其次宜亟表之以風世云志孝友

漢

全柔

漢末舉孝廉補尚書郎右丞董卓之亂棄官歸州辟別駕從事詔書就拜會稽東郡都尉舉兵附孫策策表柔爲丹陽都尉徙林陽太守

宋

徐雄

文伯子克傳其家業工診察位朝奉請事母孝謹母終毀瘠幾至自滅俄而兄亡扶杖臨喪撫膺一慟遂卒

齊

杜栖

字孟山京產子受學善清談名儒貴游多敬待之刺史豫章王辟議曹從事轉西曹佐竟陵王子良數致禮國子祭酒何嗣治禮又重栖以爲學士掌婚冠儀以父老歸養怡情畎畝栖素肥及京產疾旬日間便皮骨白支京產亡水漿不入口七日既殯晨夕不罷哭不食鹽菜每營辦祭奠身自省視號泣不自持朔望節歲慟絕而蘇嘔血數升時何嗣謝朓並遺書敦譬誠以毀滅至祥禫夢見其父一慟而絕卒年三十

六

朱謙之

字處光父昭之以學解稱謙之年數歲所生母亡昭之假墓田側爲族人朱幼方燎火所焚同產姊密語之謙之雖小便哀泣如持初喪年長不娶永明中手刃殺幼方詣獄自繫縣令申靈勉表上別駕孔稚珪兼記室劉璉司農左西掾張融戡與刺史豫章王曰禮開報仇之典以申孝義之情法斷相殺之條以表權時之制謙之旣申私情又明公法今殺之卽爲罪人宥之卽爲孝子殺一罪人未足弘憲活

一孝子實廣風德豫章王言之世祖世祖嘉其義慮相復報乃遣謙之隨曹虎西行將發幼方子憚果伺殺於津陽門謙之兄選之又刺殺憚有司以聞世祖曰此皆義事不可問悉赦之吳興沈覲聞而嘆曰弟死於孝兄徇於義孝友之節萃此一門論者曰火燎尸柩何至手刃生人以致迭相仇殺殊不可訓然亦足徵前代法網之寬而意在敦教化原風俗也後世烏得及哉

梁

褚脩

父仲都善周易天監中歷五經博士脩少博其學善尺牘辨文章武陵王為揚州引為宣惠參軍帳內記室性至孝父喪毀瘠過禮及丁母憂水漿不入口二十三日氣絕復蘇每號慟嘔血竟以毀卒

宋

錢蘇

字岳甫素以孝義知名嘗建傑閣藏書甚富蘇軾榜曰錢氏藏書閣仕至直秘閣知荆南府

毛存

父伯益坐流嶺表死存跋涉數千里函骨歸葬人稱其篤孝善畫墨竹水石如楊中齊裴德游諸公

高其行皆宗之號勿齋

郭義重

字處仁其先興化軍人早游太學以操尚稱年四十餘客錢塘徒跣奔母喪每一慟輒嘔血家貧甚不受餽遺聚土為墳手蔣松竹而廬其旁甘露降詔旌其閭後特奏名補官六十始婚以高年終

元

鮑信卿

字完澤六世祖瑞仕宋從南渡家於杭信卿資識粹敏慎重寡言涉獵經史過目輒不忘元元貞初詔州郡為蒙古學信卿習其語言文字至順初翰林寇學士嘗遊其門因以學行薦於朝信卿以奉母辭至正中江浙叅政寶哥及郡使者復爭辟用終以母老不就人皆稱為篤行君子

明

姚文

杭州前衛左所軍早喪父事母盡孝身隸戎伍每晨出趨役必拜母而往暮還如之母卒擇墓地玉泉山下詰旦忽有虎至其地跑而成穴遂葬焉天順二年旌表

馬純

字叔良其先西域人元末父景華避亂居錢塘弱冠父歿每一號慟輒頓絕景華臨終囑純曰我葬後當十日一墓省純如期必往哭甚哀奉母飲食必躬調以進得一美事或出外見一新果必歸奉母承顏順色未嘗輕去左右或勸之仕曰吾忍一日離吾母乎母疾徬徨營救形為枯瘁母歿號泣勺水不入口者三日既葬構一菴傍墓以居與人交尙風義其師歿無子為營墓奉神主於家塾

褚價

字木中稍長喪母既壯喪父哀痛愁苦幾不能生母歿有嘉木二突生牆上葉類梓桐價奇之移植所居傍閱數寒暑二木驟拱高出屋數尋父歿後一日有風起樹末俄而怒號樹幾折價曰古人有欲養不能逮者取喻風木天其警我歟與二弟相向抱木哀號風乃止當事為冢風木軒揭其居

楊壽

字愷之天順丁丑進士授刑部山西司主事終廣西右叅政卒於官天性孝友歲時食物必先以奉其親親食始食居父喪毀瘠骨立二兄相繼歿撫其遺孤同於已子在刑曹獄無冤滯理廣西戎政事無偏徇人服其公

孟春

年二十九為人傭得錢歸以供其母成化九年三月初六日夜隣火燎迫其居母王氏方臥不覺春聞遽歸不顧烟焰入負母或止之不聽遂與母俱焚死

劉均美

名醫性孝友異母弟勝生三歲父病且亟顧均美指勝欲有所囑而不能言均美泣曰大人寬心他日當如大人意父首肯始瞑均美為教養娶妻至生子盡以父產讓勝而自構屋北郭甘泉里以居洪武間以間右實京師居織錦坊仍以醫行喜蓄善藥售不二價又喜施故四方市藥者日無算而丐藥者益無算均美旦起必先視丐者而後次第及市者曰罔俾丐者自嫌不來鄉人許昉遊國學貧無以自

給均美延之家昉死為殯殮歸其棺以塋暮年術益精活人益多壽九十卒所著有拔萃類方四十卷劉氏慶源錄三卷子用賓孝友世其家

張璟

性孝友家累萬金悉讓其兄不留一錢自私父臨歿語之曰為汝埋黃金首飾白金三千餘兩土中他日可取為用也後兄蕩廢其業無以衣食璟特告兄埋金處盡奉之一無所取鄉里以為難

金洪

事母竭盡孝敬嘗割胛肉愈母疾及歿刻木像工以血塗之洪曰奈何以猪血汙母刺胛取血周塗其像朝夕奉祀一如生時忌日哀號悲慟鄉里又體母意養貧女弟及其夫子割產中分之未幾火燬其室獨像纖毫無損成化間有司以事奏聞詔封承德郎洪家素封嘗輸萬金助邊孝宗欲官之洪固辭賜御棍良馬遣歸四世同爨人稱孝義

翁浩

字世宏自少至老未嘗有偽言過行事父母至孝昏晨定省出必告反必面即一日屢出亦屢告既

歿亦必向本主告之不改嘗入京師在舟中忽心痛少寐即見母病狀驚悟比歸母果感疾與兄弟子析產浩時出遊還書戒其子廣平曰吾誠耻是爾無取均焉廣平奉教田廬取其瘠敝者器物取其窳朽者人稱浩砥行教子不愧古人云

郭金科

家世勲蔭父允臣業賈嘉靖丙辰金科年十六夜隣火起沿及其居金科身護幼弟文科從焰中出倉皇回顧不見父母遂付弟與隣人復急從焰中人眾挽不聽而父已焦頭爛額從焰中掖出火益熾一家十一口無脫者次早覓屍金科已死尚握母手及二弟共斃表其閭曰孝弟之門仍春秋歲祀

孫宗黻

字仲文幼有至性六歲喪父即知哀慕母楊鞠奉養每旦必具衣冠問起居及請所欲既得請即治具以進雖資給不充而甘脆必致有所告母或不應則長跪請故深自引匿必得命而後起時物未奉母不以入口母或感微疾衣不解帶以待湯藥奔走禱

祀無不至及母以大耋終哀號不輟居喪三年廬於墓側逮免喪後猶日榜一舟攜飯蔬至墓所泣奠墓左右有以地來售者宗黻慨然曰吾欲廣吾親墓而使若親無葬地可乎厚加稱貸而謝之人謂黻孝子能錫類矣及年踰八十病既革猶扶掖至母氏旌節坊下稽首謝國恩寵其終身不敢忘親若此成化間旌表

林巒 有孝行有司表其墓

陳其志 割股肉愈祖母病學使者旌其門

王言 字汝綸府學諸生事二親至孝親終哀毀骨立思慕不輟刻木像以事之正德十三年巡按鮮公廉得其真批行提學道云取士以文不若取士以行時督學劉公欲以廩餼之言堅辭不受劉益重之扁其門曰淳孝

李中華 湖墅人邑諸生萬曆中境大火中華自外歸火已及其居父尚在舍與弟中楫入覓之不可得二人遂與父俱焚死

王葵 字士忠右衛人少業章句不就乃學為古詩歌又入必告詣膝下肅揖親嘗怡色則喜否則懼戒家人毋敢出聲伯兄歲行役京師葵請往父母曰爾代兄勞孰與遺親安也葵即留治家囊不容一私錢母憐之與五金營兒女費葵辭不受暨父母亡兄求析居業已均產葵顧妻取篋金七十五兩來仍兩均之兄愕問安所得金曰某年月日母與吾五金為兒女費者也吾息之幾年得此義當與兄共其出納具有時日不爽云

李端 字元貞世杭州前衛指揮僉事少勤問學累官溫處守備以親老告歸尋為湖廣都司使再懇歸養親終端已老執喪哀慟如少壯有司旌之

凌立

字子中少孤事母以孝聞登嘉靖癸丑進士官比部明允有聲遷建昌太守多惠政為僚黨所忌罷歸為人爽朗多幹畧事母色養備至老而彌篤母歿一慟骨立數月竟卒人謂終身之慕立無愧云

王錦

性至孝奉養必備甘旨二親寢疾湯藥必親嘗及卒哀毀骨立嘗習業山寺中一日曝魚頭百餘枚人怪問之曰供大人朝夕之餘耳以貢終肅府教授子尚賓博學能文

何倫

字士明天性孝友方四五歲得所分鮭魚不食而藏之夕更薦父母稍長讀書至古人忠孝大節輒撫几而嘆父病不解衣侍湯藥五閱月及卒哭踊不欲生凡附於棺者必竭盡其力不敢以貧故儉其親及葬負土成墳與傭伍雜作哀感行路以母氏病勿克廬墓晨往暮歸蹙蹙道路嘗衝雪而僵遇所知掖之返又嘗警於虎不為動歲大祲與妻子雜採湖中菱芡共米菽而飯三時上食列簋如故母不知其為祲歲蓋甘倫之養者三十年閱八秩乃終而倫亦白首矣猶孺慕如喪父不少衰伯兄死無嗣俾其子為

嗣亭丘嫂如事母買二地而封樹之以歸父母族之貧死者家故有甘井闢汲道以予鄉里共義聲孝譽

人無間言邑人有相訐以家庭事者倫嘆曰是不可長也親雖不慈子不可以不孝乃為正俗入議上於監司郡守眾躋之倫老益篤於學有家規心訓二書并雜詩文名曰何孝子集督學蘇濬序而刻之

虞舜卿

字國賢少為諸生薄舉子業竟棄去日以古文詩歌自娛顧司馬璘許郡伯應元大賞之其於技藝方術書畫皆通而尤篤於孝友養母及其母所愛子代兄漕濱死不怨酬以沃田轉授諸侄一日哭父墓間空中語曰有虎言至再甫及山下而塚有蹠跡矣夜奔視母疾雙燈自移引路人以為孝感所致云所著有雜集握奇經註子淳熙別有傳

錢華

字文谷天性篤孝嘉靖辛酉壬戌聯捷年未弱冠以奉親不急仕進家居至十餘年始赴闕掌制誥旋擢禮曹釐定藩制貴戚側目華慨然曰孝友亦為政吾親老未敢以身許遂拂衣杜門色養怡怡備極

天倫之樂

童漢臣

字仲良嘉靖乙未進士為江西道御史簡按山西條陳邊計嚴嵩當國歎曰嵩貪淫狡惡必壞天下事矣疏入謫楚藩都事聞父計奔歸家居十年蕭然終老會徐學詩疏嵩不法事謂其矯詔傷直臣列漢臣名起廣東都事累遷泉州知府平彭湖寇賜白金采幣尋陞江西副使以母老乞骸生平篤孝好施遵母意以居第讓兄出橐歸兄及姊妹侄甥輩一無所吝同年張文東早世昇田養其孤友蕭鶴臯道卒躬為扶

櫬還鄉

嚴調御

字印持有二弟武順敕皆太常卿大紀之子太常世籍禹航宦成乃卜居錢塘初艱舉子高夫人為置貳楊夫人生調御小字曰高李夫人生武順敕調御九歲而孤天性孝友諸母在堂若不知為異母兄弟也鄉人為之語曰閨門濟濟嚴高兄弟一門自相師友四方賢士大夫道武林無不願一接三嚴

者與同里聞啟祥善啟祥歿時調御方六十却賀者曰我方哭寢門之外豈以犬馬齒忘我良友耶為廢舉觴未踰月調御歿武順葺其家門酬和之詩曰三嚴作朋集已敕疾篤武順在禹航聞弟病遂一臥不起蓋自太常以來三世同居一門雍睦亦希有事也

傅齡發

字長含弟齡熙字長穆並儀部巖子巖在金華城破不屈刃將及熙時年十四以身蔽翼其父刃著於頤而死發起救矢洞左腋而仆少頃復甦見父弟死慟曰吾一家可謂無負國恩矣遂以手抉其創創裂而卒時三屍皆枕深草中三日巖妻姜與其長子齡文始克殮荒山無人僅收其骨遂各以墨志其髀股匣之以歸後二十年始克葬於祖墓之傍發熙皆有文名發秀整熙雄健與其伯兄文號三俊俱狗父兄之既節烈

孝友出於一門

國朝

虞鈞

字峻民邑諸生少孤事母至孝家貧教授供母務

得歡心母病醫藥不效鈞割臂肉以進病遂愈後母卒廬於墓側無力庀材僅築小舍中設六尺卧具不容起立早出受學暮宿廬中常夜深雪數尺迷失道陷大澤中止露肩頂呼號曠野杳無人跡自分必死忍守墳者持燈出門聞鈞聲趨救之詢其故曰頃因卧不安席一似有迫予起者初不知孝子落坎也因嘆息以為神寡嫂失明事之如母以脩脯所入即手奉之族中有未葬者二十餘棺鈞出資為之窆安一日家絕糧貸於友得米五斗負歸途遇發棺者即共疎族欲鬻墓木於人鈞因痛哭守之不去其人懼而逃鈞以所貸米設法埋之比歸家已三日不舉火矣鈞飲可一石母歿終身不御酒肉乙酉後絕意進取躬耕自給年六十一而終其兄子汝翼有文名見苑文

應尙倫

字思橋性純孝年十一喪父因壕下故業養母柴自傷背父茹素四十餘年娶婦張一語忤母

尙倫大怒立召親黨議出之母反覆慰諭乃止自是婦姑更相愛婦張卒柴感其孝慟不欲食逆風失音手足不舉尙倫為母病延醫百方救之三日而起已而復病者七年周公宗建令仁和旌以篤孝尙倫性慷慨喜施與設粥糜以濟饑餓燃火炬以照行旅為棺槨以施死亡巡鹽侍御傅公宗龍聞而善之亦發金助焉子搆謙讀書好古以聖賢自命周規折矩為一時名儒見理學

陳向榮

字雲來自姚江徙杭七歲善屬文補邑諸生性純孝父患肺疾已久然喜飲酒飲不劇則咳滋

甚家貧偶絕炊未嘗不備甘脆供名釀以奉色笑自館舍歸必取中裙廁踰親自浣濯積十八年如一日向榮念父久病遇飲食不忍下箸嘗館於友人方張坐取酒念父即告歸有吳太學者延之江寧期來歲五月返臘月下浣向榮忽心動告歸留之不可時江行有阻乃從孟河入南徐走險抵家父大喜歡笑如平常詰旦則溘然逝矣人以為孝感所致向榮廉正剛方不苟言笑顧喜排難陰濟人急自刻死期人咸

異焉有子廷會孝友廉潔棄諸生教授里中與應橋謙俱稱為武林篤行君子見文苑

方杰

字子凡品端學醇天啟辛酉舉京兆試例謁選得縣令杰以其父老病遽引疾歸不赴公車者十五年益勵節操絕跡公庭著自警數則崇禎十年舉賢良方正當事爭欲引之終以親老力辭司鐸旁邑旋引去性素仁厚嘗置義田以贍親族值歲祲與同志設粥廠食饑者 國朝督學鄭開極特允與請祠祀鄉賢子天摺邑庠生

能文工書以篤行稱

顧大觀

字維垣其先上虞人徙居錢塘父恒宇客死於粵大觀時年十二迎喪於粵以孤童行萬里踰

大庾嶺歷十八灘每際險輒呼天哀籲路人為之感涕經小孤颶作江豚噴沫若雨舟覆者數矣從者皆無人色大觀伏柩哀號颶忽止舟中人額首曰吾輩幸免魚腹賴此孝童耳事大父及母陳皆以孝聞與弟友愛無間年各六十猶同爨出入錢穀簿籍無所私宗姓無親疎悉敦睦或嫠而能守孤無依者悉寘

諸家或廩之終身乙酉亂兵掠子女流離道上傾橐中裝贖之還其父母少穎異與張墉龔五諛交有聲於太學以例選應得椽幕屬慨然不赴子六人次子豹文貴封侍御

錢瓚

字仲瑟父九臯生三子長瓚母何出瓚與琮母沈出九臯為龍驤衛參軍以瓚與其弟琮從未幾卒

於官瓚時纔八齡哭泣如成人母沈以九臯遠宦客亡欲以身殉瓚驚號伏膝下請曰越家三千里父既棄兒母子相依為命母痛不欲生兒亦相從地下矣沈聞其言痛絕持之泣始勉進匕箸母病禱嶽神願以身代夢神謂曰上天見汝精誠功令母更延一年事伯兄如事父出入必稟命弟琮勿怠於學立責之且泣曰汝不力學何以慰老母乎琮卒為名士瓚資性醇謹雅不喜章句獨精於易又以聖學務精體用凡禮樂兵刑農田地利河渠賦役等書編纂成集少為博士師茗雪之間從遊者戶外屢滿性謙至老益恭以長子世清貴累封觀察年八十有八卒

吳暉

字宜中生有至性年十二父紹昌以貢赴闕感陡疾卒於舟櫬歸暉跪奔哀慟欲蹈水以殉念有母

在中止事母備極孝養年五十猶孺慕比終過時而哀每諱日易服涕泣如新喪事諸兄友愛叔紹達喪

子心欲暉為嗣暉以禮當繼孫而子筠又居長無已以次子籀嗣遂經紀其兩世喪皆葬獅子峰下後自

營塋即祔其傍曰吾以此慰叔心生平尤篤友誼性嗜學以明經教諭分水年八十七卒子筠庚午解元

已丑成進士盛負文譽克光父業

徐德延

字解脩生秉至性文名籍甚父崙早世奉母孫備極色養母病草拊其背曰青紫非他物當從

汝斑衣中來耳居恒輕貲財排患難里閭推為祭酒順治十八年舉鄉邑賓會其子孺芳成進士歸圭幣

盈門郡人榮之

王均

字以中年十五祖母病劇思羹飲均割股肉烹和以進壬午登賢書乙酉父道焜殉國難均乃散髮

衣麻向墓門長號不絕遽骨立服闕謝絕世事尋以疾卒

項大章

字孟崱九歲能屬文試輒剋多士事父鳳洲至孝隱處有痼疾日佩艾囊經宿一易章必手為

之易弟大烈邁危疾躬調湯藥所遺子女為之教誨嫁娶經紀一切辛已歲大饑捐貲為粥食饑者同里

十餘戶負國租催科甚峻閤門聚哭將鬻其妻章為輸納得免嘗語人曰人好競處之以恬人好爭處之

以忍然於是非所在往往義形於色舉丈夫子五次子景襄為兵部左侍郎誥封弘文院檢討年六十六

而卒

徐欽安

字翼鄰邑諸生有文名自幼儻負大志父友夏彞仲陳卧子諸先輩甚器重之事親以孝著

叔卒為仲弟完姻母舅亡為治喪舅母及姊居孀調恤備至撫甥如子親族稱其友義國初

王師征閩募民操舟凍餓多死於道安上議於當事歛民財貼船戶船戶倍利而民免死至今定為例民賴之

且輕財好施援人之困鄉黨莫不敬焉母病醫不效
禱天以身代一日忽語子曰吾得請於帝矣翊日即
卧疾三日不起母病得
愈以子潮貴贈如其官

洪翹

字鷺公號雪巖少折節讀書賦性穎異下筆數千
言立就十四為邑博士弟子員試輒剋軍其為古

文詩辭鎔煉歸於大雅明季文社盛行幾釁鉤黨之
禍翹力為維挽三吳之士賴以無患晚遊太學考授
邑丞需次歸里生平於門內之行甚篤父歿邵武任
徒跣奔喪扶櫬歸行哭甚哀路人為之泣下母病顛
天請代日不交睫者浹旬後母歿治喪極哀盡禮嘗
捐腴田五十畝充歷祖蒸嘗輸貲修葺宗祠復捐田
助時享至今族人稱之子應星熊星登進士弧
星舉人承襄惠之遺一門甲第皆世德之報也

霍祿科

康熙五年隣火祿科父萬言年八十餘蹒跚未
出祿科冒烟救之文舉復入救其祖父俱遭焚

次早見文舉灰骨猶跪依祖若父膝前里隣
憐其孝請旌巡撫范承謨具疏特題報可

何蘭旌

字湘來生而孝友父死蘭旌年已四十哀慕如
孺子泣母病侍湯藥十四晝夜不解帶目盡腫

每自念寡兄弟撫從兄弟如同懷嘗歎曰譬則一本
皆吾父母同體也歲辛巳大禳給糜粥施藥餌全活
甚眾少為名諸生經史百家靡不通貫尤精於易性
好朋友始終不替與人解紛息爭事定終不言功祖
母陳年二十四而寡撫孤有成飲冰茹蘖五十九年
年八十有二以壽終及疾草蘭旌一慟幾絕子喬雲
康熙丙辰進士孫瑾栗等皆
登鄉薦人以為節孝之報

錢封

字軼秦五歲通孝經見客酬對中節從祖相國文
貞公鍾愛之善屬文屢試棘闈中乙科者再父士

璋隱居赤霞山倜儻不為生產計封遂兼綜家政絕
意進取性孝友年十三執母徐喪里中稱為小孝子
繼母林娶四載而歿又室其女弟當是時封以一身
事三母并撫四弟食指浩繁皆仰給一身詎諱時聞
一以寬和處之甚至情理所難無不曲順親意蓋有
王祥薛包之行其後同母異母弟皆早夭娶婦孤兒

撫循顧復不遺餘力父年八十封晨夕承歡有嬰兒色父嘗嗜鵝炙值早禁屠宰不可得封間行隘巷得之市者懼禍匿勿予封告之實市者見其誠迫乃出炙納諸懷中亟歸酒盞猶溫見父啖之甘融融以喜其艱苦行孝類此壯歲喪耦王鰥居四十年日恐來人不能如元配賢同族有負官租借營債者皆竭蹶代償外王舅別駕徐一源殉難歸德迎其親屬養於家而後母父無嗣為構別墅居之順治己亥廷議江浙紳士抗糧下令考核封以吏胥飛灑嫁禍言於撫軍白其冤全省得免吏議所居東里累於門攤丁役相率逃避封捐資首倡代輸官賦閭里獲安歿之日人為隕涕年七十六壽終以子彥雋封儒林郎孫景登乙酉鄉薦授中書

陸寅

字剋周吉水令運昌孫父圻世所稱麗京先生者也寅幼而穎悟能詩性孝友年十六圻罹無妄家無少長被逮寅亦見收就獄三木之屬擇輕者與尊行而獨取重者兄某憐其幼弱欲易之固爭勿釋獄

吏為之感動尋事解圻將遁跡遠從方外遊寅哭挽之勿得圻三年不歸音問杳然寅以一身上事老母下撫弱弟妹皆盡心力會母歿寅遂治裝出門徒步訪父歷東粵往廬洞庭湘潭還經天台剡中復登泰山涉沂水凡荒崖絕壑深林窮谷靡所不至其最險幾殆者莫如海上二嶗蓬萊為甚如是者十餘年釐面重胝水宿風餐絕無退念康熙丁卯戊辰間經燕冀遂應京兆試聯捷成進士益欲效朱壽昌故事求親終不可得見哀慕勞瘁嘔血而卒年四十三著有浣花集自知錄

范文燦

字仰雲性至孝父梓構危疾刲股和藥甫投頓愈事伯兄甚謹析產則推肥就瘠子五人能承其志三世同爨里中稱為孝友孫允鏞成進士官侍御

何之銘

天性純孝父死母屠有清羸疾每夕祝天願以已算益母壽遂至八十八而卒初娶陳後娶杜皆無子因買一妾於馮方入門其父泣而言曰予舊族向償官糧暫鬻女與後贖今馮賣女於公累世德

矣泣下之銘慘然即日命攜其女去杜後連舉二子之銘止一女弟以母素所憐愛遂贅妹婿同居族孫女二人失恃之銘力為匹配杜亦有婦德能相其夫成善士

張璠 字魯毓邑諸生十歲喪母事繼母克盡子職有兩弟一為同產早嬰疾卒力勞喪殯撫弟子女如已出異母弟式愛若同胞獎勸成名中癸巳舉人父卒之際遺有逋課追呼百出兼邁奇荒璠以一身仔肩不以纖毫分累兩弟蕭然懸罄泊如也子恂亦有文名

吳文清 字元鑑父岷泉慕神仙遠遊不歸文清年十四告母尋父裹糧歷諸省會險阻備嘗卒從中州物色得之相抱痛哭堅請乃歸色養備至友愛兄弟撫猶子如已子有司屢辟薦以親老力辭後清病子弘模割股祈代康熙甲子模子耀舉孝廉人謂積孝所致

凌紹乾 字子健中康熙己卯副榜第二為人嚴氣正性矜惜名節父病籲天願以身代奉母盡孝母卒哀慟骨立卒隕其身閭里推為純孝生平博聞強識手註經史性理諸書有問是師是移是因是等集及瀟碧齋稿榕城偶吟行世後從祀鄉賢

張淳 字君陳性醇謹少孤養於伯父一讚家後又繼叔一賢後淳事之如一承歡笑伺顏色母蔣寡淳陳諸有司以三十年矢志禮當旌門有司許焉淳少不事生產有餘即散窮乏年七十二卒淳從兄沆字濬之淳少師事沆沆老於諸生年至八十兄弟友善相間一年而卒

潘之洵 字漢甫性至孝事父母先意承志唯諾必謹兄之浹早死其嫂何哭之哀之洵懼傷父母心跪泣而請何感其言遂止何十九而寡事之五十餘年不少怠

王一麟 諸生少孤力學母邵哭父失明麟悲痛舐目復明母又病噎麟禱於神請以身代母夢神賜劑而愈祖母高患癰麟侍湯藥衣不解帶累月臨喪哀毀骨立膠庠以孝聞康熙九年巡撫范承謨疏題

得報旌其門
給銀建坊

黃扉

字階晉食餽錢塘居母喪三年茹素擁草
席宿總帷前歲時伏臘未嘗一入內闈

張渭芳

同倫之子母沈氏病篤渭芳年十七祝天割股
進母疾遂瘥後復發欲見其媳父即為娶媳

江氏女入門年始十六見夫以割股得驗亦潛割之
剪深見骨暈而仆小姑見大呼江亟起掩其口而陰
以肉煮藥奉姑病仍已江
以新婦為此尤人所難

李綱文

字友臯少有至行事父母備極色養父罹劇疾
綱文刺血書疏膝行至吳山禱於城隍歸即割

股以進父病忽痊未幾母又疾篤綱文亦祈神割股
母病復愈子二長天柱辛酉舉人次國柱歲貢孫莊
亦登
鄉榜

周鰲

字輿載世居江潁以忠厚孝弟聞閭里昆季七人
鰲為家督慕張公藝風與諸弟友愛無間以故終

其身諸弟絕口不敢言析箸事後鰲卒食指益繁不
得已乃謀為分析鰲子霖字雨三以冢孫例得別授
應分霖悉散族人之貧乏者又霖有弟已出為叔後
霖仍析已貲予之曰予同父義不得異視已而弟中
落霖復贈以多金宗族有艱於昏葬者揮數十金不
吝霖子三長崧丙子副榜對常州別駕徵乙未進士
王之英 字延叔三歲失母哭泣如成人事父以孝聞巡
撫范承謨旌其門子甫白好學能文有聲庠序
周濂 字貽遠性至孝事親能以色養家貧依依膝下不
肯離一夕父詔之曰而不聞仲由負米事乎濂乃
強出應大僚幕府之招每得父手書拜跪而後啟一
語一諾已復拜跪如三國顧悌故事主人為設珍物
濂不敢食曰吾親未嘗也必多方覓人郵致之撫愛
少弟教育婚娶以至成人年七十子先濂卒以弟子

為嗣

陳堯湘

字雍明九歲而孤事孀母邵竭盡孝養母多病
堯湘偕妻李氏晝夜侍側呼天號顛願以身代

母瀕危復生者再
人以爲至孝所感

吳必英

字懋功家貧力不能得甘膳養母因業瘍有酬金者輒市肥鮮歸進母會母疾革刲股以療勿

效俄而隣火肆虐英長跪柩前曰見在此母勿憚兩手捧棺棺重不可舉指爪盡裂因披髮徒跣繞棺奔走呼號四隣皆各自顧莫能相助英身翼棺獨以手撲火衣履盡燬頭髮皆灼而抱持棺益固嚎咷聲益高稍稍有聞者從烈焰中共挽柩出之英面目腫黑手足炮裂尚泣以頭捨地謝救者不信宿竟以火毒死惜無嗣同里陳張霽何景雲爲傳其事

胡乾生

字旦明八歲而孤母梅撫鞠之兒時嘻戲擲瓦礫誤擲隣屋隣人怒出惡聲梅責乾生乾生嚙

一指血淋漓且跪且泣曰兒從此改矣乃折節讀書年二十問業於名醫張存甫之門午夜讀素問內景諸書每漏下四鼓乃止遂精其理後梅得疾夢群鷄飛啄之毆去復來由是徧體皆痛乾生禱於神夢神

告之曰此孽緣奈何乾生遂茹素終身爲母懺悔疾小愈後母復病且亟乾生聞東嶽爲司命之神往虔禱之請以已十二年生數代其母神復告之曰如爾願爾壽不永矣乾生頓首謝而母病果瘳至十二年果不起乾生又三年亦卒乾次子穎紹亦孝母喪明穎紹百計治之不愈聞親子女以舌舐乃愈遂如言舐之月餘果復明

顧蘭

諸生鄉試作五經題以越格被擯纂脩前朝實錄藝林稱爲外史嘗割產以讓兄膳養寡嫂三十年

如一日因祖籍代役軍伍乃力請當事豁王氏軍而復本姓焉

朱高治

字培宗廩貢生性至孝少卽刲股救父其妻吳在室時能刲臂愈父疾至是復與夫同刲以救

其舅及夫疾草又刲臂焉冰霜自矢奉姑能代子職訓子儼如父在撫庶不啻已出

汪潭

字千尺事父母能得歡心父病籲天刲股得以愈後歿哀毀盡禮與弟滄友愛無間同居共爨生平

不別設筭篋一錢尺帛無所私弟亦恭其兄垂老不敢自擅必諮後行兄出逮夜必伺歸乃寢後滄疾革握兄手不忍訣兄亦以痛弟故不匝暮卒子孫感其義至今不分析臺使者歷旌其門

馮光裕 九歲父卒哀毀如成人及娶李有婦德事寡母以身代母病即療

病即療

孫敞 字愷殷父嘉琦性友愛兄嘉琦無嗣乃以敞出為其後會琦病甚敞日侍藥餌浣厠踰衣不解帶者

浹旬尋病愈後復舉弟而敞親愛之踰於同懷人謂有辟包風及琦歿酷暑日走深山經營窳窳遂致勞瘁卒隕其生生平樂善嘗製絮褚以待寒

者歲率為例子之驥共五人皆游庠序

俞三得 南壁里人少貧賤屑菽為腐杭俗重炙鵝三得嘗市以供母念已貧且老為弟娶婦以嗣父祖

母終哀毀如嬰兒啼未幾亦卒

姚廷瀧 字震青郡庠生年十三母孫氏疾篤虔禱於嶽神請以身代復謀割股以療外祖母窺知之憐

其幼力止之瀧曰若得母愈何惜此生遂割股以進未幾病卒人皆惜之

項毓楨 諸生有文名因父病禱白岳值風濤覆舟瀕危猶哀號曰倘父病得生死且不恨及毓楨死其

子景脩哀毀骨立勉強治喪迄襄事一慟而絕人以為父子俱死孝云

何兆斗 字吉文性素孝謹父偶失足墮樓項折氣絕莫救斗驚泣捨地顛天血流被面父忽躍起曰吾

數當絕賴子積孝格神使活斗益虔顛父齡後竟耄終執喪哀毀既殯日必省墓一日渡舟失足亦若神

掖且曰爾當水厄以孝增紀後果十二年而歿事後母備極色養妻朱亦孝家庭雍睦為人所稱

陳鳳起 父鵬母張患血症起遍求醫藥不愈遂茹齋日夕顛神願以已算益母果延齡者十年至辛酉

母病劇起倉皇無策復割股進終不可救欲絕粒以殉念父老勉餐而股瘡迸裂垂斃問里具聞邑令遲

所欲上其事起
泣辭特旌其門

吳琮

字魯園少能文貢太學廷試第一擢國子監學錄
一時名士集都下咸師事之尋晉秋曹出疑獄數
十大司寇蔚州魏公甚器重每取咨焉性至孝甲
寅閏變負母避亂山中遇虎咆哮而前琮厲聲曰母
驚我母虎視遁去著有輯柳
齋詩集子登賢書筮郡守

倪蘭

字晚公生有異徵重瞳三乳四歲祖中翰播抱置
膝上讀書即能隨誦十二赴童子試文多奇句性
尤至孝幼侍會祖母寢善承溫清嘗隨祖往謁蘋村
徐少宗伯摘問詩文應對如流因贈以時果不食懷
歸奉母徐益異之母顧體素羸至是有身而病蘭旦
夕顛天所以身代未幾母病益篤蘭私語其兄曰母
病已成倘免身不起吾何以生為顯揚之報在兄與
弟矣兄聞言心動越二日母歿蘭哀慟無措既視飯
舍潛往密室自經時年才十有五為康熙庚寅六月
方炎暑鬱蒸屍留兩晝夜如生青蠅不犯閭里喧傳

欲上請旌詳
溫斐忱傳

王冲翰

字素修郡庠生孝友性成祖病刲股以進目不
交睫不解帶者十旬 國初兵至冲翰以妻病
獨守空舍兵怪問答曰妻病不能偕往吾去彼且餒
死義不忍也兵相戒勿犯其家營地將葬親或謂葬
法宜中子於君非利弟脩玉請別扞冲翰不可曰窀
穸以寧先人何論弟利吾利乎其篤行不惑如此老
貧喪子以
弟子後

徐周官

字又且國學生性純孝母病劇嘗湯藥侍床蓐
不離左右者月餘及歿哀毀骨立人稱死孝事
父尤能色養花晨月夕邀父老友聚飲以娛親意少
鮮兄弟友愛諸姊甚篤嫁時贈奩傾囊倒篋不少吝
鄙城中貧乏者周恤備至賴以舉火者數家族人國
課不能償悉周官代輸歲以為常貧不能葬及無後
者皆周官為之維持
經紀鄉里咸慕敬焉

傅夢熊 傳相子年六歲失怙母路氏教之書史兩三復
輒能記憶八歲能文閭里目為神童家貧棄書
習會計母病時割股以食及母喪七日不食人勸勉
之始飲水每哭泣必至嘔血凡歲時伏臘及忌辰祭
祀無不痛哭終身不衰至事祖
母屠氏益謹人皆稱為純孝

王法平 字斧兩父寅見忠節傳法平賦性純孝工為文
補郡庠生試輒高等當明荒亂之際奉母茹備

極甘旨歲甲寅母嬰痼疾卧床蓐三載平勤侍湯藥
寢不解衣一夕夢神人授以藥方如法服之即愈明
年學使程汝璞遣使賫金來聘平以母年邁固辭尋
遇 恩詔浙撫陳秉直以茹苦節上聞蒙邀 旌獎
及茹歿平枕苦寢塊日惟進三溢米身不脫經帶時
有白鳥止於庭服闋始去平年五十三歲卧疾不起
自以父忠母節不獲顯揚力疾著成忠貞兩錄讀之
嗚咽不已氣結而終人皆以平為孝閭里胥感化焉
康熙四十三年杭郡守張
恕可祀其主於先賢祠

論曰孔門四科首言德行而不言孝其稱孝者閔子

一人而已若曾子聖門高弟得聞大道孝經一書與

曾子問答獨詳而曾子之言孝又莫詳於戴禮乃曾

子不以孝名何也其所全者大也夫孝百行之原人

固有功業震天壤而不無門內之憾亦有獨行在側

陋而不必譽聞之著者名與實不同則真與偽分焉

爾自東漢書別傳孝友而德行孝義始分為二余讀

其書建武以迄黃初二百餘年纔十有一人而已吾

錢邑從杭府志則自晉及明千三百餘年又僅得十

金坡集言 卷之三十三 二十九
人甚矣孝之難也漢以薦辟求賢才故士多節操敦
孝弟公卿於焉交聘朝廷爲之側席而巨孝之名聞
於天下猶且辭讓者再至隱約以終其身者名在史
籍也乃及其敝而尙有舉孝廉父別居之誚豈非名
過其實歟攷明志所載亦皆以微賤著聞豈聖人所
謂立身行道黑名於後世者百不得一二人歟今自
明萬曆及我

皇朝又得知于人然則孝魚神雀湧水飛錢之異至性所
感天爲之應奚必古合人遂不相及耶

